

中國名人傳記叢編

文海出版社
有限公司印行

續碑傳集

續
碑
傳
集

繆荃孫纂錄

卷四十一至卷五十二 監司・守令

文海出版社
有限公司印行

續碑傳集卷四十一

守令二

江陰繆荃孫纂錄

襄陽太守鄭公傳

周樹槐

鄭公敦允號芝泉長沙人也年二十三登嘉慶甲戌進士改翰林院庶吉士授刑部主事稍遷員外郎中道光八年出守湖北襄陽府權武昌兼護糧道道光辛卯科鄉試提調官回襄陽十二年正月卒公博覽強記尤究心法家言在刑部屢決疑獄犀照臚解堂上官委重焉兩遇京察皆最其治郡有所興除不避艱鉅本之以精心輔之以勤力是以事無不舉下車觀風集七邑士周諮利病發策問所宜先乳泉書院圯新之令所屬學官各舉一二人闢署旁隙地居之優其餼廩躬親教育示風厲七邑士蒸蒸焉公謂以後世官民稍闊遠古之利民之政或至擾民去其害而民自利襄俗樸直少訟游民潛匿教唆公嚴拘痛懲之皆竄伏公故長聽斷判決常至夜分積牘爲空訪所屬衙蠹及莠民最爲民患苦者十餘人論如律民大悅襄故多盜公請帑籌息充捕費邏者四出躬督飭爲設方略獲盜百餘巨盜梅叔驍勇多徒黨人少莫能近以眾往則逸公偵知所在卽夜率壯丁馳禽之榻上其徒追者數百公

令曰欲奪犯者殺而以其屍與之眾莫敢逼以杖歸訴者廬至皆曰久不敢以言言輒火其居也公曰苦吾民矣宜城南漳之交港汊紛歧壤錯安陸爲盜藪公親相度請飭兩郡各委官督兵役巡哨禁居民夜渡便稽察河道肅清穀城陳家坑河灘險峻奸民以巨石截流籠竹取魚曰置方水沸湧舟近石則糜公嚴檄毀之商民額首稱慶棗陽土瘠民貧客商以倍稱準其產田入客籍者多公飭縣控追者許貸戶自陳子浮於母則除之積困頓蘇漢水舊至方山歧爲二分繞郡城南徑檀溪北貫襄樊至明楊一魁築老龍堰南流絕水合益駛齧樊城壞民居十之四五公議贅石隄四百餘丈視土程工二年而成不愆於素明年漢大漲樊城賴以全襄郡岸高水下遇旱無從引溉公繪筒車式頒郡屬至今爲便利焉江故有救生船苦閘不相及公權武昌益造複底輕舸旁施漏規破浪衝風不憂沈溺會異漲瀕江田廬盡沒救濟無算襄屬雖水不爲災樊城石工有被掣者公固請回任及水落修之襄人走迎三百里日夜牽挽而至議沿流增砌子岸護隄根刻期蒧事而各郡災民以襄稍豐就食者烏集公倡捐籌振爲蘧廬數千居老疾婦稚木柵環之壯者令赴工自食公日巡工勞勉會雨雪工未竟而公疾始隄之

成襄人亭其上亭臨漢水望峴山曰對峴亭公爲之記公卒襄人相與哭於亭其明年乃撰次公治蹟卓卓者十餘事請祀名宦督撫學政會疏以聞

制曰可

周樹槐曰公與伯兄荔農同舉癸酉鄉試其後八年伯兄成進士余以選人從始識公京師公在刑部已有聲又六年公出守京師士大夫過余吉水者言公終當入掌刑部也公竟以襄陽終公弟奔喪朱至舟泊襄干二人刃而登勢張甚舟子襄人也出呵之曰何爲此鄭公家迎喪者也曰噉則退舟子告曰彼襄中巨盜也以名捕者五公殺其三矣曰不虞相讐邪曰公持法平人信之彼盜何敢然烏乎公勤民而民不能忘詰盜而盜不敢怨孟子曰是非之心人皆有之信矣哉昔之傳循吏者一二端已足不朽余以襄人言彙次之備

國史采擇焉

陸書村傳

姚瑩

嘉慶之初教匪蹂躪川陝湖北郡邑被擾者百數

朝廷選將命帥討之八年後定閩閩元氣未復也又擇賢守令撫循久

之乃蘇道光七八年閒猶有未盡復者其閒陸君畫村以循吏稱君名
成本浙江蕭山人唐忠宣公之裔也始以諸生援例得按察司經歷至
四川值教匪亂從川北總理軍務劉清軍中德參贊賞之調赴大營甚
見委任事平授宜賓縣知縣歷署三台儀隴清溪諸縣雷波通判潼川
敘州二府知府所至以撫循瘡痍與民休養爲事或請蠲免歷年積欠
或移社倉入城官爲經理以除民累兵弁有虐夷人激變者君捐貲撫
卹得兵治之不戮一人夷安而民頌之道光七年升巴州知州地在萬
山中極遠闊逃亡未集豪強者多以賤價典質田廬得之遂爲己業而
不納官租及田主歸無力贖田賦不得免君憫之悉令計質價而分其
業各任輸租賦乃有著而民無困州鹽有引無商民賴擔負以濟日用
官人賾給執照私爲商秤苛剝之復多設鹽差搜捕走漏者民苦之君
急請以課歸丁追照毀秤民勒其示於石而祀之君復捐廉代償民逋
十分之二不二年民皆歸復如承平時其他善政甚眾十二年乞歸時
年七十矣歸十數年卒於里年八十有六里中恂恂不談從軍及爲吏
時事率子弟以禮法力行諸善義事而已先是雍正中有請以忠宣公
從祀聖廡者禮部謂公未講學中止道光五年君言於學使吳公曰諸

葛亮范仲淹歐陽修皆未嘗講學而已從祀先臣學術粹然本仁祖義舉而措之可致純王上理徒以年少得君入參幃幄未遑著述貶後避謗故不著書奈何以此少之吳公奏上明年遂從所請君嘗重刻忠宣公及楊椒山集劉蕺山人譜陳文恭四種遺規監懲錄式敬編其汲汲於世道人心如此又自以所見集經驗良方刻之得其方者如證投之立愈亦忠宣公集驗方之遺意云

論曰循吏不可緩於世也久矣矧荒亂之餘乎陸君書生從戎不矜其功而孳孳爲吏惟愛民是務年至耄耄恂恂儒者觀所行事可謂不忝其先矣癸卯秋余奉逮過吳君孫次山候余乞爲君傳諾之久未復也次山頃以書來云昔蘇州卓契順持蘇邁書訪東坡於惠州曰昔蔡明遠鄱陽一校耳魯公絕糧江淮閒明遠周之魯公憐其意遺以尺書天下至今知有明遠蘇公亦善契順君獨不憐機而與之乎感次山之言乃敘次協相湯公所爲墓志而爲君傳次山名機方通判蜀中君之弟二孫也

臺灣府海防南路理番同知沈君墓志銘

劉鴻勳

誥授朝議大夫署臺灣府海防南路理番同知事沈君欽霖以道光十

二年秋臺地逆匪張丙等作亂君與守郡城是時福省聞警巡撫兼署總督魏公元烺調陸路提督馬公濟勝帶兵進剿十戰皆捷欽差福州將軍瑚公松額同制府程公祖洛渡臺搜捕餘匪籌辦善後機宜論守城功君得列上薦奉

旨賞戴花翎卽以知府歸部儘先選用十三年秋余由廣東南韶連兵備道調補臺灣兵備道十月舟抵安平接見君驚喜交集蓋君余在內閣時舊友也初君嘉慶辛酉成進士官中書撰文詞下筆數千言大學士諸公咸倚重庚午典試湖南所得多名士因失察家丁滋事革職大學士諸公奏請效力會典館書告成開復原官甫到閣行走旋委署侍讀與余同直情浹洽嘗論作詩賦謂詩尙煩構思不知賦何用思索爲故閣中同寅無不推尊君之能文者道光二年派充

寶錄館詳校官議敘一等四年八月除授福建福州府平潭同知六年五月署邵武府清軍同知九年三月署興化府知府旣卸篆調署臺灣府海防同知君於平潭同知任內乙酉戊子兩科皆監試文闈福省官知與不知咸目君爲溫文爾雅儒者也及任臺防猝聞張逆等之亂起嘉義不動聲色密檄飛飭所屬番弁選精壯屯丁三百人保逆黨率眾

窺伺郡垣君督番兵會同文武迎敵奮力擊賊生禽林龍陳電等寸磔於市使賊不敢越嘉義以南嗚呼何其壯也臺地固稱積亂難治之區自康熙閒朱一貴倡亂以後叛者十四次士大夫之官斯土者難矣然使作吏者盡如君或能先事預防不至於亂卽亂能如君之精詳明決亦可卽時殲滅勿煩勞內地大兵悲夫張丙之初起藉口於搶米嘉義令邵用之不知其叛謀被殺死臺灣府呂志恆前往賊已聚至萬人父老攀轅泣留不聽戰死斗六汛縣丞方振聲竹城破並妻張氏焚死幼女亦從死幕友沈志勇父子家丁江永惠等皆從死武弁自副將而下死者萬餘人惟總兵劉公廷斌兵敗幸不死保嘉義城亦以憂憤病死君嘗謂余曰方事之殷也有死之心無生之志今出萬死一生之中賴國家威德妖寇盪平臺地沿海諸省之保障非勵精圖治無以久安余方壯君之言而君以積勞已齎志以歿矣君精於吏治任平潭時立書院治埔田士民皆悅署興化府時木蘭陂工程甫竣開挖涵洞以資灌溉培築土埂以保農田署臺防時裁減口費體卹商艱方議改船政謂宜使漁船配穀蒙制軍嘉獎而君已卒余皆略而不詳者士不遇盤根錯節不別利器所以著君生平之大節也君諱欽霖字仲亨一字芝堂

先世自前明太常寺少卿諱漢遷居於吳江縣城南之水西莊遂著籍焉曾祖諱重祖諱焯本生祖諱阜上皆

貽贈奉政大夫內閣中書曾祖妣陸氏祖妣陸氏本生祖妣朱氏皆

貽贈宜人考諱宗德乾隆乙酉舉人歷任靖江上海縣學教諭

敕授文林郎

晉贈奉政大夫內閣中書妣趙氏繼妣趙氏皆

敕授孺人

晉封宜人配范恭人生三子長祖原早亡次慶原次庚原先君卒孫男四人桂芬桐封柏年楣昌生於乾隆己丑年九月十六日午時卒於道光癸巳年十二月十九日子時壽享六十有五歲慶原治君之喪將歸葬於吳江祖塋之側來乞銘余在內閣知君久銘之余宜銘曰

君生於吳官於閩卒於臺君之卒也適余其來臺地郡城賴君守臺地善後待君裁天胡不少留盡君之才嗚呼非斯人之哀而誰哀

書君碩農家傳

何日愈

書碩農綸字紫園碩農其號也漢軍正藍旗人本姓甘氏其先世於明永樂閒以從征遼東功授瀋陽衛指揮使世其職後降襲千戶遂居瀋

陽之鳳凰堡

國朝順治初其五世祖諱應春者從龍入關始隸旗籍以武功仕至福建漳州協副總兵高祖文煥蔭給事中累遷直隸按察使曾祖國燦太學生本生曾祖國延由河南河內縣令歷官兵部武選司郎中祖仕鑑以

特恩選錄舊家子孫授筆政本生祖仕鏗由太學生授州吏目補廣西金城寨巡檢仕鑑無出以碩農太翁際華嗣由官學生考職縣丞借補直隸青縣主簿遷滄州判官生君兄弟四人伯恪敏仲卽碩農也叔恪仁季恪宗碩農少沈毅寡言笑孝友敦篤太翁及太夫人吳氏咸鍾愛之總角從父授書聰穎善記稍長精騎射以太翁游宦故君遂廢學年十七始下帷發憤遂貫穿六籍登嘉慶戊辰賢書太翁常以正修齊治爲訓碩農亦慨然以經綸匡濟爲己任未幾而吳太夫人與太翁相繼逝碩農哀毀骨立以未克祿養爲恨聞者悲其志焉太翁居官素廉囊橐蕭然青滄士民素感太翁惠政釀金相賻復得同僚夾舟之助碩農始得扶輿回京卜葬於先塋之次道光壬午成進士出宰西川補冕甯以廉能著旋調西昌歷權三台蒼溪巴州簡州越巂司馬事長於治術

政尙嚴而明燭覆盆故所至胥篋斂迹胥吏不敢仰視民鮮罹法其始治三台卽平反程興國冤獄士民頌之台邑文風久不振每課士輒爲講論文義飲以膏火學者感發摩厲自是領鄉薦者數人任蒼溪首修學校卹孤獨之無歸凡有便於民者以次舉行蒼俗婦女好輕生或姑婦勃谿或室家反目或鄰里角爭往往投繯而所親復藉以居奇婪索無厭盈谿壑而後已君爲嚴禁且作勿輕生論徧諭民閒其風稍息故受替之日父老爲之零涕其任冕甯也甫下車廉知奸胥猾吏與鄉豪比黨肉視里閭莫敢訟理君按驗得實置數人於法一縣肅然邑故多雹損民禾稼民以畧訴君哂其妄乃禁畋獵時樵采患遂已大府察君能調西昌爲甯郡附郭首邑接壤冕甯民素聞君嚴明莫敢以身試法雖夜不閉戶晏如也先是郡城東河常爲患每遇山水驟漲阡陌廬舍悉成巨浸城東南隅圯君至卽繕城浚河又築隄捍禦民免漂溺再莅巴州也故刺史魏君以憂去是時值州境大旱饑民萬餘胥食富室莫能禁人情洶洶咸謂變且不測大府知君能檄往莅事多爲君危君至卽榜示曰若皆吾赤子迫於饑饉故假貸富民今吾粒若其悉來勿擾鄉曲卽啟倉發粟饑民知君之果粒之也遂散而就振君又自捐俸并

勸諭紳民及富商巨賈輸粟相助存活甚眾闔境以安當碩農之發粟也咸謂當先請於方伯監司候可乃得行碩農哂曰若俟贖請往返彌月則亂成矣否則求民於枯魚之肆矣聞者歎服越肅爲西蜀邊徼古雋蒙詔地萬山環繞延袤五百餘里皆與番夷連畛數十年來酋長花甲石髓常出巢爲患殺掠人畜不可勝計雖屢經官軍剿捕而軍至則負嵎自固軍退復擾故師屢出無功君奉檄撫茲土也親按視邊境體察地勢謂利濟梅子營等處左右崇山夾峙下臨深谷溪路處其陷如鼠行穴中道旁叢薄翳翳寇每潛伏其中以俟商旅前後邀截欲逃無所故爲其虜因繪圖上之建議改路於高阜寇旣失從高視下之利又無叢薄之障地高路曠一望數十里寇之眾寡瞭然在目商賈可禦則行否則退而避之又當於扼要處所增置營堡聲氣聯絡盜必不能爲患大府然其議會君及瓜王司馬受事固能吏也如君言遷道建營三十里間斥候繼屬王司馬復誘石髓至城而扃鑰之豐其飲饌與之約曰境內安則生否則死石髓唯唯暗諭其眾毋得擾邊甯遠王太守復購花甲之首以千金花甲知怨家多遂埋首巢穴自是越肅無邊患君與有力焉大府以卓異薦而碩農歸道山矣享年六十有四屈處百里

未竟其用識者惜之有人倫鑑甲午分校蜀闈得士七人皆知名士族姪甘守素需次蜀中疾卒於錦里碩農遣僕視含斂助其喪葬卹其家室未幾守素母又卒又葬之嫁其女於吳氏鞠其嫠孤其好義又如此長於詩文著有古文二卷重修冕甯邑志若干卷建南風俗略一卷有益山房詩集四卷聽理得閒卽復書生結習與余及山左王雪嶠大梁李紅樵餘杭吳音木江左趙竹庵蜀人潘紫垣郵遞唱酬爲人虛伫不立崖岸人有佳句則稱道不置詩胎息魏晉辨香子美得風雅正宗余與碩農訂交十載碩農常嗟余不遇余亦悲碩農之未展其驥足也屢欲次其行誼政績以未得巔末而止丙午夏君弟恪宗以縣丞需次江南不遠數千里致余書並君生平事略一帙曰先仲兄與君交深知己莫如君相得亦莫如君敢以家傳請余不敢以不文辭因兼采訪輿論次第其事而書以備太史氏他日之采云爾

贊曰昔武侯治蜀以嚴而蜀治碩農法之而所至亦治國氏有云唯有德者能以寬服人其次莫如猛故有水懦火烈之喻斯言旨哉碩農蓋奉斯言以周旋故厯著循聲至其再蒞巴州拯饑民於堯隆弭禍患於片言亦能矣哉

崔偲傳 順天府志

崔偲字怡庭號茶農霸州人幼聰穎總角時母郝教以唐人詩卽能解其大義及受書攻苦倍恆人誦習至午夜不輟所著甌笠一夕爲燈火所燃方讀弗覺也母爲補綴之族祖某見而訶之以爲年少好修飾及詢知乃大笑年十九嘉慶九年舉人十三年進士以知縣卽用山西歷任趙城潞城永和臨晉知縣丁憂服闋復選湖南祁陽縣知縣調攸縣知縣前後莅官六任所至以文章飾吏治當潞城之解任也士民赴省籲留大吏爲動容驚歎永和處萬山中僻且陋偲弗鄙夷其民民以謀訴必爲之諄復勸勉多感泣不克訟而去臨晉頻年苦旱偲禱雨輒應民歆頌之偲曰是胡可恃也境內舊有凍河八十里日久淤塞因相度形勢會商上下游各縣挑濬之使水旱有所蓄洩工訖奏明

記功一次期年內清理積案二千餘以卓異去其莅祁陽也適湖北大禱流民屬至沿途繹騷偲預爲之所及至則飲食寢處皆有資藉眾咸帖然是歲咨送流民過境也七萬餘人而合邑若無事者道光十二年江華搖煽亂陷東安新田等處盤踞常甯與祁接壤邑人士紛紛議避偲曰賊未至而徒驚是自擾也今之計惟聚鄉團修器械防要隘察奸

民協力禦之乃可有濟且民與令異令之家口省垣可以寄居僚友可以寄託民去此安之乎令今誓與爾民同生死爾民其聽予言因爲之設方略籌守備一時民情大和隱然有眾志成城之效焉是時調集楚黔兵會剿祁居水陸衝要兵差絡繹日不暇給自正月軍興至八月凱旋逆匪無一人竄入祁境者九月調攸縣以積勞發病卒享年五十有三

連州知州鄭君墓表

梅曾亮

道光十三年湖南猺民趙金龍唱亂永州煽連州八排猺兩省連官兵上出信臣經略之事久乃定先是鄭君心田知連州以四十八排猺三隸州五隸連山性愚悍又積受漢民欺易生隙乃嚴民猺內外防條上十事務先事絕機牙總督某公以非常事重發之君卽引疾歸時嘉慶十九年事也夫先十餘年而慮變變卒生不可謂不智變旣成軍功多越等君睹幾先不敢一日安其位以去遇合之利鈍信有命焉而安之如君者爲不可及也君慈谿人諱雲龍字心田自宋元居縣之鶴雀村考諱明母氏馮少孤習吏事兵部勤而材有貴人贈以衣謝不受議敘清江閘官歷清河縣引疾歸改捐直隸州權湖南桂陽州條列利病事

不行謝病去嘉慶十六年河決李家樓總督張文敏公奏請君董官局
事以勞先選得廣東連州盜案十七人當論死君廉其實釋二童子時
騎行田間訪疾苦捐金助學舍故在官未久而繫人思居京師普濟育
嬰養濟各堂院歲出家財助官葬無姓名者百餘棺有姓者王胡二棺
友人貸金卒往弔焚券紙錢中而去又知名非深友者邑人某負官銀
二萬憐其得罪重倡捐代償歸其養於家噫君志慮深縻不得施用於
成法出餘緒惠老存孤此固凡人士所樂道而君亦遂以善人終君以
道光十二年卒京師年七十六歸葬於慈谿丈山之巉頭娶張宜人繼
室盧宜人子七人邦彥丙皆邑庠生錄侯選州吏目鎔刑部主事重舉
人錫文進士戶部主事最幼者珠女六孫男十女孫六君起家艱難而
好儒學爲兒子延師居解衣出借乘甚重且恭歸安孫編修辰東卒未
葬子憲儀困於奔走君資之曰請歸葬而還館吾家憲儀吾友也乃表
以應其介邦彥之求

河南濬縣知縣朱君墓志銘

鄧顯鶴

州縣爲守土吏倉卒有警以全城保境爲功最至不幸必取一死雖
朝廷卹典優加而城殘地破生民塗炭所失多矣況